



Broj: 03-05-471/14  
Goražde, 04.04.2014. godine

**PREDMET:** Izvještaj o implementaciji Odluke o interventnim mjerama zaštite građanskih, ekonomskih i socijalnih prava

U skladu sa članom 10. Odluke o interventnim mjerama zaštite građanskih, ekonomskih i socijalnih prava Vlada Bosansko-podrinjskog kantona Goražde napravila je Izvještaj i analizu provedbe ove Odluke, a naročito člana 6. koji se odnosi na interventne mjere.

1. Prva mjera koja se odnosi na osiguranje imovine i ljudi od općeopasnih radnji može se smatrati ispunjenom jer u periodu demonstracija, a i poslije njih, nije došlo do narušavanja javnog reda i mira u većem obimu, niti je pričinjena materijalna šteta. Vlada BPK Goražde je usvojila izvještaj MUP-a o preduzetim radnjama i aktivnostima u periodu o kojem je upravo iznesena ovakva konstatacija.

2. Druga interventna mjera odnosi se na osiguranje efikasnijeg, pravednijeg i održivijeg upravljanja javnim resursima:

- Izvršeno je trenutno smanjenje tekućih izdataka organa uprave. Vlada je donijela Zaključak kojim su ministri pozvani da daju saglasnost na umanjenje plaće za 10%, što je i učinjeno. Sličan akt donijela je i Skupština BPK Goražde, a koji se odnosi na poslanike u Skupštini BPK-a Goražde. Vlada je utvrdila Nacrt zakona o izmjenama i dopunama Zakona o naknadama plaća poslanika i funkcionera koje bira, imenuje ili čiji izbor i imenovanje potvrđuje Skupština i isti uputila prema Skupštini odnosno Komisiji za budžet i administrativna pitanja, čija je nadležnost predlaganje ovog propisa. U ovom propisu predložene su sve one mjere koje se odnose na umanjenje primanja koja imaju izabrani zvaničnici i usvajanjem ovog zakona stiže se i pravni okvir za regulisanje visine ovih naknada kao i drugih prinadležnosti, kao što su troškovi mobilnih telefona, reprezentacije, naknada za vrijeme neraspoređenosti i dr.

- Naplata potraživanja na temelju poreskih i neporeskih obaveza je u toku. Problem kod realizacije ove mjere predstavlja to što je većina nadležnosti vezanih za prikupljanje i kontrolu ovih obaveza u nadležnosti federalnih institucija, prije svega Federalne poreske uprave, tako da je neophodna saradnja i koordinacija sa ovim federalnim organom kako bi se pojačale i naplata i kontrola. Vlada BPK Goražde u više se navrata obraćala Federalnoj vladi, kao i Poreskoj upravi sa zahtjevom da se Kantonalna poreska ispostava rukovodno i kadrovski osposobi i trenutno je u toku konkurs za popunu određenih pozicija u ovoj upravi.

- Zaustavljeno je izdvajanje iz Budžeta za sve tekuće transfere osim transfera prema općinama.

Treba istaći da ova mjera, pored svog pozitivnog finansijskog efekta, predstavlja veliki problem Vladi Kantona u svakodnevnom radu, jer se veliki broj obaveza koje Kanton ima, kao i rad vladinih i nevladinih institucija, finansira iz tekućih transfera, te dosljedna primjena ove mjere uveliko otežava i rad Vlade i ovih institucija.

- Potpuno je obustavljena isplata za sve komisije i radna tijela koja se plaćaju iz Budžeta.

Iako ova mjera svakako ima pozitivne finansijske efekte, problem u funkcionisanju naročito imaju one komisije koje u svom sastavu imaju angažovana lica koja ne ostvaruju primanja iz Budžeta, a ista su zbog svojih profesionalnih zvanja ili vještina uključena u rad ovih komisija, jer isti već najavljuju svoje povlačenje. Takođe, jedan broj komisija u svom radu ostvaruje značajna finansijska sredstva za Budžet Kantona, te se postavlja i pitanje motivisanosti za rad koji neće biti plaćen.

- Na službenoj web stranici Kantona javno su objavljeni podaci o svim primateljima sredstava iz Budžeta (misli se na plaće uposlenih u kantonalnim organima uprave), a radi se na prikupljanju podataka i za druge institucije čiji je osnivač Kanton.

- Na web stranici Kantona objavljen je i dio podataka koji se odnosi na date subvencije i transfere za pravne i fizičke osobe. Transferi iz oblasti boračke zaštite su kompletno objavljeni, dok se za socijalne kategorije i druge korisnike još ažuriraju baze podataka.

- U ovom periodu nije bilo nikakvog zapošljavanja u organima uprave Kantona, niti u drugim institucijama koje se finansiraju iz Budžeta.

3. Interventne mjere u oblasti poboljšanja materijalnog položaja socijalno ugroženih osoba, uključujući i mjere u oblasti zdravstva, ispoštovane su upotpunosti:

- Donešene je nova Esencijalna lista lijekova koja je upotpunosti usaglašena sa federalnom listom. Po prvi put donesena je i Bolnička lista lijekova i tzv. B Lista lijekova na kojoj se nalaze lijekovi koji nisu na Esencijalnoj listi, ali su vema skupi i koriste se u našem Kantonu, a naročito kod boračkih kategorija. Na zajedničkom sastanku predstavnika Vlade, Fonda zdravstvenog osiguranja i Kantonalne bolnice dogovoreno je da se obustavi naplata bilo kakvih usluga građanima u Kantonalnoj bolnici.

- Dogovoren je modalitet i način zdravstvenog osiguranja za povratnike iz našeg Kantona u Republiku Srpsku i isti će biti proveden u kratkom vremenskom roku.

4. Interventne mjere u oblasti rada i smanjenja nezaposlenosti su strateški i stalni zadatak ove Vlade. Gotovo su svakodnevni kontakti sa potencijalnim investitorima, kao i postojećim privrednicima u Kantonu u smislu novog zapošljavanja i otvaranja novih radnih mjesta. Razmatra se i modalitet donošenja propisa kojim bi se pokrenulo zapošljavanje osoba mlađih od 27 godina kroz smanjenje doprinosa za iste i donošenje jednog ovakvog propisa u kratkom vremenskom roku je sasvim izvjesno.

5. Provođenje mjera u oblasti osiguranja vladavine prava, borbe protiv korupcije i kriminala je u toku. Agenciji za privatizaciju naložena je dostava podataka koji se odnose na dosadašnji tok privatizacije u našem Kantonu, posebno onih postupaka koji su već više godina predmet različitih interpretacija i špekulacija u našem Kantonu. Po dobivanju ove dokumentacije Vlada će istu analizirati i dostaviti nadležnim institucijama na provjeru. Vlada će i dalje insistirati da istražni i pravosudni organi ispituju sve sumnjive slučajeve privatizacije ili kriminalnih radnji u našem Kantonu.

Uzimajući u obzir prethodno navedeno može se konstatovati da je implementacija ove Odluke kao i druge mjere koje je provodila Vlada, a koje nisu predmet Odluke, dalo pozitivne efekte, te da se treba nastaviti na realizaciji onih mjera koje nisu u potpunosti ispunjene.

Obzirom da je to navedeno i u ovom Izvještaju da pojedine mjere predstavljaju ozbiljnu smetnju u funkcionisanju Vlade Kantona i da počinju imati kontraproduktivan karakter, to će Vlada Kantona Skupštini predložiti određene izmjene ove Odluke, naročito u dijelu koji se odnosi na isplatu tekućih transfera i plaćanje određenih komisija ili njenih članova koji nisu iz kantonalnih organa uprave.

P R E M I J E R

Emir Frašto